

O'ZBEKISTON RESPUBLIKASI VAZIRLAR MAHKAMASINING QARORI

SAMARQAND DAVLAT CHET TILLAR INSTITUTINI TASHKIL ETISH TO'G'RISIDA

O'zbekiston Respublikasi Prezidentining "Samarqand davlat chet tillar institutini tashkil etish to'g'risida" 1994-yil 8-noyabrdagi **Farmoniga** muvofiq Vazirlar Mahkamasi qaror qiladi:

1. 1994-yil 1-dekabrda boshlab Samarqand davlat universitetining tegishli fakulteti negizida Samarqand davlat chet tillar instituti tashkil etilsin.

2. Quyidagilar institut faoliyatining asosiy yo'nalishlari etib belgilansin:

roman-german filologiyasi sohasida mutaxassislar tayyorlash;

chet tillar bo'yicha pedagoglar, keng ixtisosli tarjimonlar va ekskursiya olib boruvchilarni tayyorlash;

maktabgacha tarbiya pedagogikasi va psixologiyasi bo'yicha chet tillarni biladigan mutaxassislar tayyorlash va ularni qayta tayyorlash;

oliy ta'lim negizida til ixtisosliklari bo'yicha kadrlarni jadal o'qitish;

chet tillar bo'yicha mutaxassislarning malakasini oshirish;

1995/96 o'quv yilidan boshlab o'quv jarayoniga yangi pedagogik texnologiyalarni, shu jumladan, chet tillarni jadal o'qitish texnologiyalarini joriy qilish;

institut moddiy-texnika bazasini mustahkamlash va rivojlantirish, bu maqsadlarda amaldagi qonunchilik doirasida o'z ilmiy kuchlari imkoniyatlariga muvofiq pulli xizmatlar tarmog'ini tashkil etish.

3. O'zbekiston Respublikasi Oliy va o'rta maxsus ta'lim vazirligi, bir oy muddatda yangi tashkil etilayotgan institut ustavini, tuzilmasini, o'quv rejalari va til mutaxassislarni tayyorlash va qayta tayyorlash dasturlarini tasdiqlasin.

4. Samarqand viloyati hokimligi O'zbekiston Respublikasi Oliy va o'rta maxsus ta'lim vazirligi bilan birgalikda:

bir hafta muddatda institutni joylashtirish uchun tegishli bino ajratish masalasini hal qilsin;

institut auditoriyalari va yotoqxonalarini zarur asosli tuzatish ishlarini amalga oshirsin.

5. O'zbekiston Respublikasi Moliya vazirligi institut xarajatlariga va uni o'quv asbob-uskunalari bilan jihozlash, anjomlar va o'qitishning texnik vositalarini xarid qilish uchun zarur mablag'lar ajratsin.

6. Mazkur qarorning bajarilishini nazorat qilish Vazirlar Mahkamasining Ta'lim va fan bo'limiga yuklansin.

Vazirlar Mahkamasining Raisi I. KARIMOV

Toshkent sh.,
1994-yil 9-noyabr
542-son